

2 Corintios

'Ka amõñiguh' chib pørig

1 ¹Tius nan trendø treeg kønrrain kuikkurri, na Pablo Cristo Jesús nõashib karua ørig, namui nuneg Timoteoba misra, Corintosø iglesianba, katø tru Acaya pirau muba kuimbura Tiuswei misaamera warabelanba i kilgawan pørar. ²Tius namui Møskaweimba, Señor Jesucristoimba tru ka yandø tab indig køben, chi isumgaig tab købig køben ñimba kønrrai inder.

Chine isumdeelø nebuingucha Pablo Tiuswan

'ungwa, ungwa' tailø

³Tru namui Señor Jesucristoi Møskai, Tiusbe mayanguen tabig wamindig kønrrun, tru lastima ashib pønrrabelø kømigwan tøga Møskai, katø isui meløben chiyutøgucha isui inchimønrrai purugub Tiuswan. ⁴Truibe nam chine puig meløben, namun tab kui mørtraí purugubig køn, katøganelø chiyugøben treetøwei isui meløben, Tius namun isui inchimønrrai purugúitøgatøwei namgucha purugubelø kømig kønrrai. ⁵Criston tru chine, chine kaig nebuilø namuinug treetøwei itømaytø nebul arrubene, katø treetøwei tru isui inchimønrrai purugúikkucha tru kuindø, tru kuindø Cristoinukkurrindøwei arrubig køn. ⁶Inchendø namun chine puig melamig arrubiibe, ñim chi isui inchimø tab kui pønrramigweyasiiba, kaigyugurri wesrailø kømigweyasiiba køn. Inchen namun tru isui inchimø pønrramig kønrrai publiibe, tru ñim chi isui inchimø pønrramig kønrrain kua, tru namun isui melamig nebul lataitøwei ñimun treeg nebul arruben, ñim chigúingucha melabig melamig truibe treeg attrun. ⁷Inchawei nam ñimuimbura øyah kønrrunmab isuiibe treeg kønrrab køn. Pøs nam chine kaig nebuinab melaiguma treetøwei ñimgucha pønrrabelø kuig køppe, nam chi isumø tab kui pønrraigugucha, ñimbe treetøwei tab kui pønrrønrrab kui asha pønrrer.

⁸Namui nunelø, namun Asia pirausrø purø isumdiig nebul melaigwan ñim wammøra kønrrai inder. Yandø mu melamgaig trømbøig arruptø, namuinetøbe yandø chinchá melamgaig purø trømbøig køben, yandø ke øsig webammumuitamab isubelø ker. ⁹Pøs nambe ke yandø kwamigu

puermaptøwei isub melabelø ker. Pøs øyeeg puppe, nam namasiitø namdø tsabø kermab isubelø kørnrrain kømøtø, Tius tru kwailanguen katøle øsiirangarub kusrubigwan isua pønrrabelø kørnrrain kuig køn, ¹⁰tru øyeeg trømbøig ke kwamitø palab melaigugurri nø namun ka puraambingarub, katø namun ka puraambub ambamig kørnrai martrabigwan. Incha nambe ke nuinuutø isua meler, ka puraambub ambamig katøgucha namun ashib pasrønrrab kui, ¹¹ñim Tiuswan namuyasig ‘purugurra’ chib miab meløbene. Øyamay truba yamelø namuimburab Tiuswan ‘mayanguen ungwa, ungwa’ chib kørnrun, pøs truba yamelø misra Tiuswan namuimburab miaben løtigwan nam truba nu purugúig utikkurri.

Pablo Corintosrømay chindimba imuigwan eshkab

¹²Kaguende nam tab kui mørøb pønrraibe iig køn: yu pirau namui isub kebachib pasrabigu ‘chi kalø marig køn’ chibig chigaig pønrraig, mas ñimui utube katøguchinguen isuptø amønaig købig køn. Amønippe, tru newan chishchiitøgaba, søratø kømø, sølwan marig Tiusweinukkurri arrubiitøgaba nambe amønaig køn, chine nørro kusreelø møguelainukkurri arrubiitøga marmøtø, Tiuswei ka yandø tab inditøga marøb. ¹³Pøs nam ñimun kilga pørøppe, chi peg waminchibikkucha kørnrrab kømøtø, ñim chi leb kuigwan ñim chigúí nebua mørøb kuigwan truigwan newan chigúí mørtraimab isua pører. ¹⁴Inchawei namuimburab mayandøguen nebua chigúí mørig kōppe, pøs ñimbe tab newan chigúí mørtrun, ñim namuimburab tab kui mørøb pønrramig kørnrai, tru nam ñimgurri tab kui mørøb pønrramig kørnrrab køb lataitøwei tru Señor Jesús arrub kwaløm.

Pablo Corintosrø ashchab inrrab waminchib

¹⁵Inchawei nabe iigwan treeg kørnraitamab isua, ñimuisrømaymerrig attrab isuig køn, ñim srøsrø truba tab kui nan utig kømnetø katøle nan tab kui utamig kørnrai. ¹⁶Incha Macedoniasrømay pureppe, ñimuinug pua puraya, katøle trusrøngurri arruppe, ñimuinug puatøweim purainrrab isuig kuig køn, ñim nan Judeasrøngatig yamigwan purugunrrai. ¹⁷Tru na øyeegwan martrab isuibe, ¿kabe nabe ke mõi mõi martrab kurrig kørnrrab kø chindah? ¿Kabe tru na øyeeg martrab indibe, nai isuigu Tiuswan ashmø misamera lataig martrab inchibig kua, møindø ke: “Martrab” taitø, katø: “Marmønrrab” taitø inchab inditamagueh?

¹⁸Pøs Tiusbe nø maig chippe, nøbe treegwan marøbig køb lataitøwei, nam ñimun wamindiibe møindø: “Øn” taitø: “Ka” taitø indig kømøtø køn. ¹⁹Kaguende ñimui utu na køben, Silvano køben, Timoteo køben, nambe Tiuswei Nusrkai Jesucristoimburab eshkab kusrenanig køn: “Øn” tantø: “Ka” tantø indig kømøtø, nuinuube chu uraskucha: “Øn” taig. Nøbe truig køn. ²⁰Kaguende Tius kerrigu nø chi martrab cha kørromisriiløbe Cristoinuube: “Treeg martrab” taig, truig køn. Inchawei nambe Cristogurri: “Treeg køn” chibelø ker, namgurri

Tiusbe mayanguen tabig wamindig k nrrai. ²¹Inchen Tius n t wein k n Cristoinug mur p nrramig k nrrai mar biibe namun lata,  nimun lata. Incha namune nuind  k nrrai tar mara p nsra, ²²nuiel  k nrrai sellot ga sellawa, namui manrrau pasr nrrai Esp ritu Santon katsig pasra tran bguen indig k n, tru tranrrab k rr misrigwan kut guyan tranrrab kui asamig k nrrai.

²³P s nabe Tiusken ashen trendam nrrun: Na Corintosr may kat gucha arrumuppe, na  nimun kaluguet m nrrab lastima ashipt  arrumuig k big k n cha. ²⁴Kaguende  nemui isubigwan Cristoinug pasra p nrramigwane treeg p nrr nrrai inchib ke nam karub p nrr nrrab k m t , masken  nim kasrag p nrr nrrai nambe purugubguen p nrrer. Kaguende  nimbe tru isubigwan Cristoinug pasra p nrraikkurriwei  nimbe mur p nrran.

2 ¹Inchawei na kat le  nimuisr may arruppe, nabe  nimun truba truba isui inchain k m t , attrab isuig kuig k n. ²Kaguende na  nimun isui inchai marene, trube,  nane mu kasraarantiasam ?  Tru na isui inchai mariil t wei kasraaranm nrraitarru? ³Inchawei nabe  yeekkurri tru merrab kilgawan na p r ppe, tru nanguen kasraaranrrabel  na trusr  puben, nan isui indingarum nrraim p rig k n. P s na kasrag pasr bene,  nimgucha chiguen k m t , mayeel ba treet wei p nrr nrraimab isuague. ⁴Kaguende nabe  nimun p r ppe, truba truba isui p rig kuig k n, nai manrraube pur  tab k mui, truba kappin k rr g b. Kabe na  nimun truba truba isui inchai martrab k m t , nabe  nimun truba truba undaguig kui ashchai indig k big k n.

Kal  mar bigwan Pablo trubur  ul  paymub

⁵Tru  yeeg isuim pasr nrrai m ikk ben treeg mar biibe, nand  k m t , kan mayangatig  nim mayeelanba isui inchai mara pasran tam nrrun, ke menrra inchim nrrapt . ⁶Inchawei tru m wan  nim mayeel  lutael  misra, nui kal  marigwan  l martrab  nim asha mariibe yand  tsab  k n. ⁷Truigwane yand  ul  payib k m , pesannab, masken ku ab purugumig k n, isubiit  yand  kerriguwan mand guen k mui inchim nrrai. ⁸Inchawei nabe  nimun tru m weimburab  nemui undag k bigwan kat le tiusmanda kenamaray tam nrrun,  nim undaguel  kui n  ashchai. ⁹Kaguende na  nimun p r ppe,  yeegwan isua p rig k n, chiyut gucha maig taigwan  nim m r bel  k tashchab ashchab isua. ¹⁰Inchawei chig ben kal  mar bigwan  nim chi ul  paym  pesannanrrab isua k rr marene, nagucha nune treet wei ul  paym  k rr misram nrrun. P s chi kal  marigwan na ul  paym , pesannappe, (ul  paymumig chi p nrraig kuig k h chindind be k ben)  nimgurri treegwan marig k n, Se or Jesucristoi merrab, ¹¹namun Satan s keg rr srk b n  kanail  k m nrrab. Kaguende nambe tsab  ashibel  ker n be chit  martrab inchibig kuigwan.

Cristot gabe kanawa puraamba p nrramig

¹²Na Troas ciudadsr , Cristoi tabig sr  wamwan esh ab kusrenanrrab pubene, Se orweimburabelan maramig yaskappe tabig kur ppe kurend ,

¹³nai nuneg Tito trusrø mu kaagøptinchene, nane nai isubigube ni mumayguen kømuben, nabe trusrøngurri nømun ungwa chippa, Macedoniasrømay ibig kur.

Tiuswan 'ungwa, ungwa' taig

¹⁴Inchendø Tiuswan 'mayanguen ungwa, ungwa' chinrrab, Cristoinuube nam kaigwan kanawa ;katø! luchimífig tsimaytø puraambub ambamig kønrrai marøb, katø tru Cristoimbura nebua asiiløbe purø may irrabzhig lataig chutøgucha namgurri larrøbitchai marøb Tiuswan. ¹⁵Kaguende Tiusweimbe nambe Cristoi tru purø may irrabzhig latailø ker, kaigyugurri wesraig pønrrabelai lata, tru managatig pinab pinamsrømay amrrab pønrrabelai lata. ¹⁶Incha møilø tru pinab pinamsrømay amrrabelaimbe tru irrabibe kwaitø irrøben, katøganelø kaigyugurri wesrailaimbe tru may irrabibe øsig kømigwan irrabig køn. ¿Inchen øyeegwan marøb pasrønrraptiibe mu kø chinderah? ¹⁷Katøganelø misaamera truba nørrø tru Tiuswei wamwan kan chigucha kømífig kui lataig an marøb srua llirabelø latawei, nambe treetøwei marøb pønrrømeelø ker. Treeg kømøtø, Tiuswei merrab waminchippe, maig wamindamigwan søra kømø, sølwan waminchib, Tius øriilø kermab isua, Cristogurri waminchibelø ker.

Tru srøig 'øyeeg, øyeeg martrab' cha kørrømisrig

3 ¹¿Kabe nambe katøguen namashib chi isumgaig 'tabelø ker' chib waminchib pønrrabra chindah? ¿Kabe nambe katøganelø latawei chi isumgaig tabelø kui ashchai, kilga pøriilø ñimun tranamig, kabe ñimgurri kilga pøriilø namun tranamig palaim pønrrabra chindah? ²Nam mailø kuigwan treeg asønannrabelø tru namuyasig kilga pørig latailøbe ñimwein køn, tru ñim purø tabig amønaig, tru namui manrrømerayu pørig pasrabig, mu misaameratøgucha ñimun mumera køtashib, mailø køtashib ashib tøgagúilø. ³Ñimbe tøgandø asamdeelø køn, kan kilgayu Jesucristo nøashib pøri latailø, tru namui maramigwan marøb pønrrailøygurri ñim srøig kurrabelø, tintatøga pørig kømøtø, øsig wab Tiuswei Espíritutøga pøriilø. Kabe srug tambalmerayu pøriilø kømøtø, misaamerai manrrømerayu pøriilø køn.

⁴Nambe iigwane Cristogurri Tiuswei merrab treeg kuitamab isua pønrrer. ⁵Kabe nam namashib øyeegwan martrapteelø namdø tsabø marøbelø kua, chi arrubiibe namuinukkurri arrubig kui lataig inchib pønrrømøtø, nam øyangatig tsabøtø marøb pønrramig arrubiibe Tiusweinukkurri arrubig køn. ⁶Incha Tius nøtøwei namune tru srøig acuerdo marigwan nam sølgandø marøbelø kønrrai mara pønsraig køn, tru acuerdo merrabsriig maig maramigwan martraim pørigwan kømøtø, tru Espiritu Santoiwan. Kaguende tru maig maramigwan martrai pørigwan mørmífigweimbe kwamigwan srua arruben, trune Espiritu Santobe tru srøig øsig kømigwan tranøbig køn.

⁷Inchen tru maig maramigu marøptøga pønrraig kwamigwan srua arrubig, srug tambalmerayu pørikken tøguegwalmabig køptø, Israel

misaamerabe Moiséswan malauguen ashchab kaimaig købig køn, nui malø torguegwalmabig køben, tru torguegwalmabiibe kwab yaindøgucha. ⁸Inchen tru øsig kømigwan srua arrubigwan marøb pønrraig tru Espíritu Santoimbe, ¿kan treetøguen kønrrab kømø, maig torguegwalmabig kuaasamø? ⁹Inchen tru maig maramigwan marøptøga pønrraig misagwan kaigyu pønrrønrrai kørrømara pasrøbikken treeg torguegwalmabig kuibe, tru marøptøga pønrraig misagwan Tiuswei merrab chi kaig kømeelø lataig tabig kønrrai marøbiibe, ¿kan treetøguen kønrrab kømø, mas purø torig torguegwalmabig køn! ¹⁰Kaguende truig torguegwalmabig lataig kuikken tru iig purø torguegwalmabiibamara ashene, truiibe chi torguegwalmabig kømøn. ¹¹Inchawei tru torguegwalmabig kwab ibikken kan treeg torguegwalmabig tøgaig arriibe, tru mana pinømø pasrabig pasrønrrabiibe ¿mas maig torguegwalmabig kuaasamørra!

¹²Inchawei tru tøgagønrrurmab isuigwan nam tøgaguen pønrraig køppe, nambe chi kørmø maig tamigwan tøgandø waminchibelø ker. ¹³Kabe tru Moisés lataig inchib pønrrømer, tru Israel misaamera nui malau torguegwalmabig kwab arrubig yandø patsi ashmønrrai, malø kasraitøga kasrøb lataig. ¹⁴Inchendø nømui turmerayube yandø chi wamindikken kebyainameelø murig misriilø kua, møin kwalømgatig tru merrabsrø Tius acuerdon marig købigwan leben, chi tainguen mørmeelø køn, tru malø pinøgasrøb pasrabiitøwei pasrabig pasraikkurri. Kaguende tru pinøgasrøbigwane Cristotøwei kerranrrun. ¹⁵Incha møin kwalømgatig tru maig maramigwan martrai Moisés pøriilan asiimørig, tru maløwan pinøgasrøbig lataig pasrabiibe nømui manrrømerayube kasrain pasran. ¹⁶Inchendø møikkøben Señorweimay llirawa pasramisrene, tru pinøgasrøbig lataig pasrabiibe nuinukkurrimbe kerraig kønrrun. ¹⁷Kaguende Señorbe tru Espíritu kua, Señorwei Espíritu chu pasrøbene, Tiuswei merrab kemalamig truyube chigucha iløsrkønrrabiibe chi kaagøn. ¹⁸Inchawei nambe mayeeløba maløwan chi kasra kømø lataig ashib pønrrabeløbe, kan espejo latailø ker, Señorwei tru torguegwalmabigwan kegurnabelø, nø maig køben nam treeløtøwei misrøb, katøguchinguen, katøguchinguen tølø misrøb amber. Treebe Señorweinukkurri arrubig køn, tru nø Espírituinug.

Jesucristoimburabigwan eshkabelø

4 ¹Inchawei nambe Tius namun lastima asiitøga i tru marøb pønrramigwan tøga pønrraig køppe, nambe chi kullaarab melømer. ²Pøš chigøben ke kørikken kønrrapteelø sørato mariilane nambe yandø wendøbasrar ker, sørato larrø møg isua marøb pønrrømøwei, Tiuswei wamwan lliska peemaytø marøb pønrrømøweingue. Treeg marøb pønrrømøtø, tru newan ciertonigwane maig kuigwan tøgandø kenamarøb pønrraikkurri, nam tabelø kuigwan namashib kenamarøb pønrrer, maya misaamerai isub kebachib pasrabigu ka inchib pasrømugumab

isumig kaanrrai Tiuswei merrab. ³Inchen tru tabig srø wamwan nam eshka kusrenanig katøgucha pinøgasraig lataig chugúi mörimig korrømisrøppe, tru yandø pinab pinamnuumay amrrabelaimbe pinøgasraig lataig korrømisran. ⁴Kaguende tru möin kwaløm yu pirau tius, tru nugwaimandziibe, tru chi køremeelane nøm chigúi möramig isubig tøgagúigwane chigúi mörmeelø kønrrai kasra pasrin køn, tru Cristoi törguegwalmabigwei tabig srø wam tørbilabigwan nøm nebua ashmønrrai; tru Cristobe Tius maig køben, truig køn. ⁵Kaguende nambe namuimburabigwandøwei eshka kusrenanmøtø, Cristo Jesúsbe mayeelaim pala nø ashib karub pasrabig køn cha eshka kusrenanøbelø ker. Katø nambe Jesucristoyasig ñimuimbe ka karuindø melabelø ker. ⁶Kaguende: “Tru løstøyugurri tør pilønrrain” cha, trenchib Tius nøtøwei namui manrrømerayu nui tørtøga kebilin køn, tru Tiuswei törguegwalmabig Jesucristoi malau pilabigwan nebua asam tørwan namun tranig kønrrai.

Chigøben trømbøig puingucha mur pønrrab

⁷Inchendø nambe iig tru purø tabigwane namui asr kan pirø køtsø lataigutø tøgaguer, tru iig maramburab marøbig purø nuig tabiibe namuin kømøtø, Tiuswein kui kenamartrab. ⁸Chiyutøgucha chine chine pui melamig nebuingucha, ke truyutø tambal ambagucha warømer. Ke kan chindamermab isumig pui meløbendø, yandø ke kaimamuitamappe isuiløgucha melømer. ⁹Namun kaig marøb amrruindøgucha, namundø elatsiilø melømer. Pøtiitsiiløbe kuinabendø, kerriguwan pinisailøbe kømuinatan. ¹⁰Inchawei nambe chu ambuptøgucha, namui asru Jesucristo kwaigwane tøga amøner, katø Jesucristo øsig waikkucha namui asru kenamistrari. ¹¹Kaguende nam øsig pønrrabeløbe Jesucristogurri chu urastøgucha ke kwaitø, kwaitø melamig nebutan, namui ka pinønrrab asru Jesucristoi øsig pasraikkucha kenamistrari. ¹²Inchawei namuinuube kwamig marøb pasrøben, trune ñimuinuube srøig øsig kømig marøb pasran.

¹³Tiuswei wamwan pøriguma trenchibig køn: “Kørewa, treekkurri waminchar” cha. Pøs namgucha namui isubigwane Cristoinug treetøwei pasra pønrrøwa, treekkurri nambe kørewa, Tiuswei wamwan waminder. ¹⁴Pøs nambe ashibelø ker, Señor Jesúsban kwailai utugurri Tius tru katøle øsiirangarubiibe, namungucha Cristo Jesúsba tru kanbalatø pønrraikkurri kusrua, Tiusbe nui merraptøwei nam ñimba kanbalatø pønrramig kønrrai martrab kui. ¹⁵Pøs kerrigu øyeeg pub arrubiibe ñimuyasig tab kønrrain køn, tru ka yandø tab indig misagwan katøguchinguen, katøguchinguen nebub ibene, ‘ungwa, ungwa’ tameløgucha nuramburab nuranrrai, Tiusweyasig maya nuguen tab kønrrai.

¹⁶Inchawei nambe chi kullaaramer. Kaguende namui asrbe patsab yaingucha, namui umbube kwalømmørig, kwalømmørig srøig misrøb

inrrun. ¹⁷Pøs nam chigøben puinab melamig ka petø pureb arrubig, kan yangucha murig kòtanmab isub mur kui melaibe managuen patsønrrabgaig kan torguegwalmabig maya nuibaguen øyeeg lataig kòn cha, kemesra trendamgaig tabigwan tøgag arrubig kòn. ¹⁸Kaguen nambe namui kaptøga asigwan asha pønrrømøtø, chi nebua asiimíggwan asha pønrrer. Kaguende kaptøga nebua asiiløbe ka purainrrabitøwein køben, trune tru kaptøga nebua asiimeeløbe managatigweyelø kòn.

5 ¹Pøs nambe yandø ashibelø ker, yu pirau nam øsig pønrraig tru namui asr ka petøweindiig kan rancho-unø mara pasrindø lataig, yandø minchib patsindøgucha, katøgan srø asr purø tab ya lataig, mu møguelø taska mari ya kømøtø, srømbalasrø managuen patsønrrabig kømígg Tius tranig tøgagømigwan. ²Inchawei nambe yu pønrrappe, tru srømbalasrø kewa purramitøga pinøbuliilø kømigwan, mana kønrrermab truba truba nuisrab isubelø ker. ³Treebe namune srø asrtøga kenanen, nambe yandeelø asr chigar kømø, tøgær kømønrrun. ⁴Inchawei i asr kan carpa ya lataigu nam øsig pønrrabeløbe larrø tab kømui, truba truba nuisrab isuig melabelø ker. Pøs namune kwamuinrrabna kòtan nam tøga pønrraig asrwan trubalatø srøig itøguenniilø kømøwatøbe, tru yandø pinab patsønrrabigwane tru srøig øsig kømibe yandø nøtø kerriguwan pinabgasra pasramisrtrai. ⁵Inchen namun øyeeg pønrramig kønrrai marøbiibe Tius nø kòn, tru treeg kønrrai Espiritu Santon katsig pasra namun tranøbguen inchibig, tru tranrrrab kørromisrigwan kutøguewan tranrrrab kui asamig kønrrai.

⁶Inchawei nambe chu urastøgucha chi isumø pønrrer, tru namui asru øsig amønippatøbe, Señorweim pulu kømøtø, nambe yabsrøndø pønrrabelø kui nebua asha. ⁷Kaguende nambe amønippe, namui isubigwan Cristoinug pasriitøgatø amøner, namui kabrrawa nebua ashagurrin kømøtø. ⁸Inchendø nambe treeg kønrraitamab chi isumø pønrrer, masken namune asrugurri tarømisra ambinrrabna kòtan, Señorba kanbalatø purrønrrab amrrab. ⁹Inchawei namui asru øsig pønrrøwa lata, asrugurri tarømisra amba lata Señor nø tab kui mørøb wanrrai marøbelø kømig namuimbe truig kòn. ¹⁰Kaguende nambe tru maig maramigwan Cristo asha marøb wainug mayeeløba kemalamig kòn, namui asru amøña tabig marig kuin kui, kaig marig kuin kui maig marigwan nam møitøgucha truburø utønrrab.

Tiusba katøle tab kørromisramig

¹¹Inchawei Señorwan mandø kørig tøga pønrramigwan nam ashibelø kuig køppe, misaamera Señorwan kørenrrai inchib melabelø ker. Pøs Tiuswei merrabma nam mailø kuigwan torgandø kenagúibe, katø ñimui isub kebachib pasrabigugucha treetøwei torgandø kenagønrraimab isur. ¹²Kabe nambe namasiitø katøguen ñimui merrab ‘truba tabelø ker’ chib pønrrømøtø, ñim namgurri tab kui mørøb kasrag pønrramigwan tøgagønrrai treeg isua inchib pønrrer, ñim tru mandø løtamigwan tøgagønrrai, tru manrraugurri

isua kòmòtò, ka palatò treeg maranmab ashchaidò móg inchib chib pònrabelan. ¹³Namun ‘locos kòn’ tainab pònrraibe, Tiusweyasig kòn. Inchen maig pònrramigwan chugúí mòra pònrraibe, ñimuyasig kòn. ¹⁴Kaguende Cristoi undag kòbiibe namune martrai trawaguchibig kòn. Pòs iigwan nam isua ashene: Cristoma kwappe, mayeelaiburò kwaig kòbene, treekkurri mayeelòba kwaig kòn. ¹⁵Inchen Cristobe kwappe, mayeelayasig kwaig kòn, tru òsig amòñibelòbe ka nòmuyasiitòwei òsig amòñimòtò, nuyasig amòñibelò kònrrai, tru kwawa, katòle nòmuyasig òsiirabigwei.

¹⁶Inchawei nambe yandò mòingurrimbunòbe mundògucha yu pirauelò isuimay ka treetò isua ashib pònrròmeelò ker. Pòs nambe merrappe Cristone yu pirauelò isua asimay ashibelò kuatògucha, mòimbe yandò treetò nebua asha tòga pònrròmer. ¹⁷Inchawei mòikkòben Cristoinug pasrabiibe, yandò nòbe kerrigu sròig kòn; merrabiibe yandò chab puraiben, mòimbe yandò kerrigu sròig marig peemayig kòn. ¹⁸Inchen kerriguba òyeeg arrubiibe Tiusweinukkurrin kòn. Pòs nam kailò kua nòbatòwei tab kòrròmisramigwan Cristo Jesús kurri treeg kònrrai mara, kailò kua, Tiusba tru tab kòrròmisram wamwan nam maròb pònrrònrrai, nò tranig kòn. ¹⁹Tru wambe iig kòn: Tiusbe nòbatòwei Cristogurri pirau maya misaameraba kailò kua, tab kòrròmisramigwan maròb pasraig, nòmui chi kaig mariilan ulò payrab isua ashmòtò. Tru òyeeg nòba tab kòrròmisram wamwane namun waminchai trana pònsraig kòn. ²⁰Nambe Cristoi munchiyu, misag utu Cristo nò waminchib pasrab lataitòwei nui wamwan waminchib pònrrònrrai pònsrailò ker. Namgurri Tius nòashib treeg maray chib pasrab lataitòwei, nambe Cristoi munchiyu ñimun tiusmanda òyeeg martrunrigay tamònrurun: ¡Tiusba tab kòrròmisramigwan maray! cha. ²¹Cristobe chigucha chi kaig marig chigaigwan, Tiusbe namuimburò nune kaig maròbig kui lataig treeg mara pasrig kòn, nam kaig marmua lataig pònrramig kònrrai Cristogurri treeg martrab.

6 ¹Nam Tiusba maròb pònrrabelò kuig kòppe, ñimune òyeeg maròb kòrrunrigay chinrrab, Tiuswei tru ka yandò tab indigwane ke chi martraamòbendò uta tògagòmòtay cha. ²Kaguende nui wamwan pòrigube Tiusbe trenchibig kòn:

“Yandò tru purugum kwalòmmera puim pasròben, ñun mòrig kòn cha.

Kaigyugurri wesrailò kòm kwalòm puim pasròben ñun purugúig kòn” cha.

¡Mòi yan kòn, tru tabig purugúigwan utamibe! ¡Mòi yan kòn, tru kaigyugurri webambam kwalòmbe!

Pablon chine chine neub arriilò

³Mugòben Tiuswei tabig srò wamwan kaashib, nam maròb pònrraigwan kaig kòn chib wamindig kòmònrraimbe, nambe kaig maròb mungucha srurrengwargarub pònrròmer. ⁴Masken treeg inchimòtò, nambe

chiyutøgucha Tiusweiwan marøb melabelø kui asiilø kønrrab treeg kenamarøbelø ker: chu uraskucha elachimøtø, marøbig marøb melamigu lata, chine kaig pub arrubigu lata, chine palai mørøb, isui melamig arrubigu lata, ⁵ichagutsiilø kømig nebui lata, kailan pønssrai yau keerig pønrramig nebui lata, kanbalatømisra kaig martrab namig kurrøben treegu melamig nebui lata, maramga murelan marøb melamig nebui lata, kibguen kimø melamig nebui lata, chigucha mameelø puraambub melamig nebui lata, ⁶chi kaig marmø chishig amønamigu lata, nebua ashib ambigu lata, chine indindøgucha tammay ka melabig melab, tab inchibelø kømigu lata, Espiritu Santo namba pasraigu lata, nam ka inchib kømø, cierton undaguelø kuigu lata ⁷cierton wamindamigwan treeg waminchibelø ker. Tiuswei maramburab marøbiitøga marøb, tru chigurrimbunø tabig sølgandø marøb pønrraitøgabe nambe kusrmayba, atsimayba srua kwayab pønrrer, kan suldau kwayab turiamig kusrmayba espadan atsimayba escudon srua kwayab pasrab lataitøweingue.

⁸Kanmaywane truba tab indinab, kanmaywane maig købash indinab, kanmaywane truba tabelø køn chib wamindinab, kanmaywane larrø kailø kui mara wamindinab, maig kuigwan nam cierton waminchendø, larrø may wamincha isapteelø kui marinab, ⁹nambe mumera kui nebua asiilø kuinabendø, asiimeelø kui lataig tøgagúinab, yandø kwawa pinanmab asha tøgagúindøgucha, øsig amønñibig amønñibelø, trømbøig ichabetiilø kuinabendø, kwamø ka øsig amønñibelø, ¹⁰truba isuilø meløbendø, purø tab kui kasrag pønrrabelø, larrø waachamera kuinabendø, misag truba nørrowan tabigwan tøgagømburab tøgagønrrai marøbelø, chugurringuen komeelø kerrigu chiga latailø kuinabendø, kerriguh tøgar treelø kuinatan.

¹¹Nambe, ñim corintosreelan, maig wamindamigwan tøgandø treeg waminder. Nam ñimuimburab isumibe namui manrrømerabe ke kurindø pasran. ¹²Ñimuimburab nam isumibe chugatikkucha kurin pasrøben, ñimweinre kasrøb tøgagøn namuimburab. ¹³Ambugurri igurri lata treeg kønrraimab isua, kan nai ureg kui lataitøwei nabe ñimune trenchar: ¡Ñimui manrrømerangucha treetøwei kura tøgagørrunrigay! cha.

Nambe øsig wab Tiuswei ya ker

¹⁴Ñim Tiuswan kørebeløbe Tiuswan lata køremeeløbabe lincha maramgaigube chi lincha maramig kømøn. ¿Kaguende tru tabig sølgandø maramiba, sølgandø kømø mariibabe chinchu kandø kønrrab kø? ¿Katø løstiiba, tørbabe chinchu trubalatø kønrrab kø? ¹⁵¿Cristoba, Belialbabe chinchu kandø isunrrab kø? ¿Criston kørebiiba, Criston køremiibabe chinchu kandø isub pønrramdiig kønrrab kø? ¹⁶¿Katø Tiuswei yaba, taska mari tiusmerababe chinchu trubalatø kønrrab kø? Kaguende nambe tru managuen kwamø øsig wab Tiuswei ya ker. Pøs nøbe trendaig køn: “Nabe yandø nømuinug pasrabig pasrab, nømui

utu uñib indamønrrun cha. Nabe nòmui Tius køben nømgurrimbe nai misaamera kønrrun” cha.

¹⁷“Inchawei treeg købene:

Tru kaig marøb misaamerai utugurrimbe webamba,
yandø nøørømisray” cha,

Señorbe nui misaameran trendan.

“Chigøben køsongømdiigwane katøramøtay cha.

Pøs marmubene, nabe ñimun utamønrrun” cha.

¹⁸“Incha nabe ñimuimbe møskai misren,

ñimgurrimbe naimbe nai nusrkalø,

nai nimbasmèra misrtrabguen” cha,

Tius Newan Maramburab Marøbiibe trendan.

7 ¹Inchawei ñim, nai undaarailø, tru Tius tranrrab misra kørrømisriilan tøgärbè, namui asru lata, namui espírituyu lata, kaig marig køsongønrrapteelan kerriguwan chish misrkun, Tiuswan køriibala pønrraigu kerriguwan nuindø newan tabelø kønrrab.

corintosreelø yandø mas kaig marmønrrab isua mørøb

²Namun ñimui manrraugurri isua utørray chinrrab inchar. Nambe møyigwangucha ñimun sølwan marmø kalø mara pønrrømøwei, kaig marøb ñimun møyigwangucha mindisha kørrøarmøwei, kabe nam ñimgurri nam tøgämisrmøwei indig køn. ³Nabe iigwan ñimun øyeeg chippe, ñimbe øyeeg kailø køn chinrrab kømøtø inchar. Nabe yamba trendaig kuig køn, nambe ñimune namui manrrau tøgä pønrrer cha, øsig amøña lata, kwamig kui lata ñimun namui manrrau tøgägnrrab. ⁴Nabe ñimune chi isumgailø kui isua pasrab, chiburø køben ñimgurri na truba tab kui mørøb pasramigwan tøgägnø inchar. Nan truba tab kønrrai mari pasrar, chine isui pønrramig puindøgucha, kasrag købigwan tøgägnøburab tøgä.

⁵Nam Macedoniasrø puabe, namui asrwane kan pishindø tabguen israb tøgägnømig nebumiig køn. Treeg kømøtø, chiyutøgucha ka isui melamitø, isui melamitø arrubig køn namune, namuim pøtøgatanbe chinetø indinab melamig arruben, namui manrraube kørig isub melamig. ⁶Inchendø Tius tru larrø kullaarai isui melabelan isui inchimønrrai marøbiibe, Tito arriitøgä namune truba tab kui melønrrai marig køn. ⁷Katø Tito arrikkurrindø kømøtø, nøgucha ñimgurri truba tab kui mørøb pasramigwan utikkurrimba køn. Nøbe namun wammørøsrkøtan, ñimbe nan truba ashig kui melaigwanba, ñim tru merrab kalø marig købigwan isua møra kappin kørrøgaigwanba, ñim naimburab truba truba isub melaigwanba. Treekkurri nane katøguchinguen kasraaranrrai martan.

⁸Pøs na ñimun tru kilga pøra øriitøgä ñimun truba isuilø kørrømisrtrai marig købigwane nane chi isumøtan. Pøs tru urasbe nane isubwei indig køn, kaguende tru na kilga pøra øriibe kan maya yanagatiitøbe ñimun isui melønrrai marøbwei inchen. ⁹Møimbe nane kasrag køppe,

tru ñim truba isui melaigwan, trunun isua kasrag kòmõtø, tru ñim truba isui indiibe ñimui kaig mariilan isua møra, Tiusweimay lliranrrai marikkurri nane kasrag kòtan. Pøs ñim truba isui inchib pønrrappe, Tius treedø treeg kønrrain køben kuig kua, nambe ñimune chigucha chi kalø punrraimbe marmuig køn. ¹⁰Tius maig palain køben nam trumay isui inchib pønrraibe ñimui kaig mariilan isua møra, Tiusweimay lliranrrai marøbig køn, kaigyugurri wesrailø kòmigweyasig trembe kaabashmøtømab isumig chigaikke. Trune isui inchib pønrramig arrubig yu pirauibe, kwamibe tøgag arrubig køn. ¹¹Tius maig palai inchen, ñim trumay isui inchib pønrraigwan ñimguen asay: ñimuinug truba marøg kui inchib pønrramig arrub, øyeekkølig kalø marøbrain køn chib tør marøb pønrramig arrub, kalø maren namig isub pønrramig arrub, køriibala pønrramig arrub, truba truba asinrrabna kui inchib pønrramig arrub, tabigweimburab ke chinsraatø inchib pønrramig arrub, kaig marøbigwane møra meganrrai marøb pønrramig arrub, treeg arrin køn. Inchawei kerrigu øyeeg purayaigu ñimbe chi kalø mara pønrrømuin kui kenamarøb pønrran. ¹²Inchawei tru kilgawan pørøppe, tru sølwan marmø kaig marøbigwan isua, truikkurrim pørmøwei, kabe tru kalø marinabigwan isua, truikkurrim pørmøwei indig køn. Treeg kòmõtø, tru ñim namuimburab truba isubelø kuigwan ñimui utu Tiuswei merrab nebua asig kønrrai indig kuig køn. ¹³Inchawei nambe chi isumø tab kui pønrramig kønrrai mariilø ker.

Nam tru treeg tab kui pønrraig kømnetø, Titon truba truba tab kui pasrai ashabe, nambe larrø tab kui truba kasrag pønrrer. Kaguende Titone nui isubigu katøle truba tab kui mørøb pasrønrrai, ñim soteelømisra purugúin køn. ¹⁴Pøs ñim corintiosmeraimburab truba tab kuim pasrar chib Titon na waminchib pasraigwan, chi køriimisra kørrøismmur. Nam ñimun kerriguba chigøben wamindiima chi isa wamindig kømuig køppe, ñimuimburab truba tab kui mørøb Titon nam waminchib pønrraikkucha treetøwei isa kømø wamindig webyan. ¹⁵Inchawei Titobe mømibe ñimune katøguchingen undaguig køn, tru nø maig karuigwan ñim mayeeløba mørøb, nun utabgucha, køriibala ke itønab utig købigwan isua. ¹⁶Chiyutøgucha ñimbe chi isumgailø kuimba mayanguen nane tab kòtan.

Merø kømø, tranamburab tranigwan waminchibig

8 ¹Trube, mømibe ñim nai nunelø, wammøra kønrrai inder, tru Macedonia pirausrø iglesiameran Tius nui ka yandø tab indigwan øyeeg tranigwan. ²Yeeg chine kaig nebuinab melamig pub arrubig ututø, nømui kasrag købigwan kasrag kømburab tøgagúiba, larrø chugurringuen kømuilø melaibabe, merøbala kømø, tranamburab tranøbelø kønrrai marin køn. ³Inchawei nabe maig kuigwan wamindamønrrun, tru nømun maig purugumdiig køben treeg purugua, nebumgaigwanguen nebua tranig køn

cha, nòmun mu tranrrai indig kòmõtø. ⁴Pøs namune truba rugabelø køn: “Tru Jerusalénsrø Tiuswei misaameran namgucha truilan tøga purugúig kønrrai treeg marbashibsrumøgue” chib. ⁵Incha nam treeg martraitamab isuigwandø marmõtø, nømbe Señorweyasimerrig pønrrønrrab nømashib pønrramisra, trugurrimbe namun treetøwei pønrrønrrab pønrramisrøbelø køn, Tius maig kønrrain køben treeg. ⁶Inchawei nambe Titone øyeegwan martrunrrig cha waminchibelø ker: “Tig truba tab indigwan ñi maig marøb pølbasriibe, katø treetøwei tru corintiosmera jerusalénsreelayasig tranigwane tabig marøb patsøgørrunrrig” cha. ⁷Pøs ñimbe isubigwan Jesucristoinug pasra tøgagømigu lata, Tiusweimburabigwan nebua ashib waminchib ambigu lata, Cristoi maramigwan tab asha maramigu lata, ñim namuimburab undag købig tøgagúigu lata, chiyutøgucha ñimbe ya merrabguen melaig kōppe, lastima asha tranøbelø kømigu chigucha iyu treetøwei merrabguen webamrrab inchigay.

⁸Maig martrain chippe, ke kandø chibig lataig nabe treeg karua pasrmur, treeg kòmõtø, ñim undag købigwan cierton tøgagúitashchab ashchab inchar, katøganeløma treeg tab marøbelø køn cha trunun eshkab. ⁹Kaguende ñimbe namui Señor Jesucristoi tru ka yandø tab indigwan nebua ashibelø køn, nøbe chigucha chi palømiig tøgag købendø, ñimun undag købiitø larrø waacha misra, tru nø treeg waacha misriitøga ñimun Tiusweimburabigwan chigucha chi palømeelø kønrrai marigwan.

¹⁰Incha iigube nabe ñimun øyeeg maramdiig køn chinrrab inchar: tru purugunrrab tulisamigwan ñimbe marig pilawei tranamigwan ñimmerrig tranøb, katø trutø kòmõtø, maramigwan ñimwei isuig kuig købene, ¹¹trube, ñim pølbasra marigwane møimbe tabig marøb patsøgamig køn cha. Tru ñim purugunrrab indamigwanma ñim ke martraptø pønrraig kōppe, trube, tru maramigwane treetøwei marøb patsøgamdiig køn cha, ñimun maig nebubendø. ¹²Kaguende møikkøben ke tranrrab isua, mayanzhig tranamdiig køben treeg tranigwane Tiusbe chi kashmø utabig køn, ke chugurrin kōmuingucha tranrrai inchimõtø.

¹³Inchendø nabe øyeeg chippe, kaneløbe chairilø kōrrømisren, ñimbe purugub meløwa, ke chugurringuen kōmui inchib kønrrain kòmõtø, ¹⁴mumaytøgucha lata kønrrai inchar. Møin kwaløm ñim chigucha chi palømiig uncha tøgagúibe nòmun purugumig køben, katøwan ñim palai meløbene, tru nøm uncha tøgagúibe ñimun purugumig kønrrai. Trumaybe mumaytøgucha lata kønrrun. ¹⁵Tiuswei wamwan pørigu maig taimbala: “Nu tulishibiibe ke unchagøm tøgagømøwei, lamøtø tulishibiibe palappuin kømøwein køn” taig.

Titon Corintosømay karua ørøb

¹⁶Namui Tiuswan ‘mayanguen ungwa, ungwa’ chinrrab, ñimuimburab na isui lataitøwei Titoi manrraugucha isunrrai pasrigwan. ¹⁷Pøs na

nun Corintosromay ya, øyeeg maramdiig køn cha, na wamindigwan ka møriitø kømøtø, nøbe maramigwane ke marøg kuindø megaig kuig kōppe, nøashib treeg martrab isua, ñimuisromay yan.

¹⁸Incha kan nuneg, Tiuswei tabig srø wamwan eshkab kusrenanøb pasraigu, chu iglesiameratøgucha nune truba tabig wamindinabigwan nambe Titoba lincha inrrai ører. ¹⁹Incha katø treetø kømøtø, tru iglesiameragucha nun lawa wesraig kuig køn, tru jerusalénsreelai tab indig purugúigwan nam srua amben, nø namun lincha attrai. Nambe Señorwan maya nuguen tab indig kønrraimba, nam purugug kui pønrraigwan katøganelan kenamartrappa, tru an tulisaiwane nam asha marøb pønrrabelø ker. ²⁰Mugøben namun 'øyeeg kalø marøpteelø køn' tainab pønrramig kømønrrai inder, tru yeeg nørrø keta traniilan nam asha marøb tōga pønrrønrrai tranigwan. ²¹Kaguende nambe chiwandøgucha maig maramigwan sølwan martrab inchib melabelø ker, Señorwei merraptø kømø, misaamerai merrabgucha treetøwingue.

²²Incha nambe katøgan namui nunewan nømun lincha inrrai ører, nui mariiløyu chiyugøben ke martraptø pasrabig kui katø katø treeg møg kui nam asigwan. Incha mømibe nøbe katøguchinguen tru maramigube ke martraptøweim pasran, ñim chi isumgailø kui nø truba isua tøgagúikkurri. ²³Pøs Titobe, naimbe nan lincha megabig, katø ñimui utu chi maramigu purugub megabig, treeg køn. Inchen tru katøgan lincha ambub nuneløbe, tru iglesiamera karua øriilø, Cristoyasiibe maya nuguen tabig kønrrai pønrrabelø, nømbe treelø køn. ²⁴Inchawei ñimbe tru møguelane truba undaguelø kuin kui ashchai kenamartrigay, iigwan tru iglesiamera mayeeløba asha kønrraingue. Katø na ñimuimburab tab kui mørøb pasraibe chigurrin kui ashchai inday.

Cristogurri nunelan purugumig an tulisai

9 ¹Inchen tru Tiuswei misaameran purugumig tru an tulisamigweimburappe ñimune chi pøramikken palømøtan. ²Pøs tru purugumigwane ñimbe purugunrrab ke muniitø pønrrabelø kui nabe ñimune ashibig kur. Incha nabe treegwan ñimuimburab macedoniasreelai utu truba tab kui waminchib pasraig køn, ñim acayasreeløbe tru tranamigwane marig pilasrøwei tranrrab chab tamara kuig købene. Inchen tru maramigwan ¡katø! marig kørrømisrtrai isua ñim marøb kuibe, nøm tru macedoniasreelø truba yamelø treetøwei martrab isunrrai indin køn. ³Øyeeg kuindøgucha tru ñimuimburab nam øyeegu truba tab kui mørøb waminchib pønrraibe, ka wamindiitø pureptinchibgunmab isua, i nunelan ørar, tru ñimuimburab na maig waminchib arrig, masken tamara kønrrai, ⁴inchippa macedoniasreelø møiløgøben naba amrrub chi inchene, ñim chigucha marmø, pesan køben puinab melømønrrai. Pøs, kan treeg pubene, namune purø nu køriimisram nebunrrab køn, ñim chab

tamara melaitamappa nam ñimun chi wammørøsrømøikkurrindø. Pøs, ñimune masken køriimisram nebunrrun. ⁵Inchawei øyeekkurri, i nunelan ñimuisrømay merrab ashchab amrrai øramig nabe palai asig kuig køn tru purugumburab purugunrrab misrig købigwan tulisam purugua yandø ke chab tamara munig kønrrai. Trumay tru ñim purugumig tulisaiibe merøbala kømø, tranig kui asamdiig kønrrai, ke tranrrai inchendø, tranig kømøtø.

‘Merø kømø, purugumigwan øyeeg maray’ chib wamindig

⁶Incha ñimbe iigwan isua kuy: møikkøben ke kagømønrraindiig ellguabiibe, katø treetøwei kagømønrraindiig tulishinrrun. Inchen møikkøben ellguamburab ellguabiibe, katø ellmarigwan tulisamburab tulishinrrun. ⁷Ñim møitøgucha tranamigwan tranøppe, ñui manrrau maig tranrrab isua tøgagúig køben, treeg tranamig køn, ke tranmuinrrabna købendø, tranmøwei, kabe ke treeg tranamig kuikkurrindø tranmøweingue. Kaguende Tiusbe kasraatø tranøbigwane undaguig køn. ⁸Inchen Tiusbe maramburab marøbig køn chigurrimbunø tøgagømigwan ñimuinug tøgagømburab unchaguen tøgagømig kønrrai, treeg maramig, chiyutøgucha ñim chi palabigwan chu urastøgucha palømø tøgagua, chigøben tabig maramigu kerriguba ñim purugub kømig unchaguen tøgagønrrai. ⁹Inchawei Tiuswei wamwan pørigube trenchibig køn:

“Larrøbitchai tsurøb, waachameran tranøb indig køn cha.

Inchen nui tru tabig sølgandø maramibe managatig pasrabig pasran” cha

¹⁰Inchen Tius tru ellmarøbigwan yell tranøb, pirri manrrai tranøb inchibiibe, maig palabigwan tranøb, ñimui yellwan nørø larrøbitchai marøb, tru ñim tabig sølgandø maramibe kan ellmarig misrøb lataitøwei nørø larrøbichib inrrai martrun. ¹¹Trumaybe ñimbe chiyutøgucha chi palømíig tøgagønrrai mariilø kønrrun, chiyutøgucha purugumigu merøbala kømø, tranamburab tranøbelø kønrrai. Inchen ñim tru purugúigwan nam nømun tranen, nømbe Tiuswan ‘mayanguen ungwa, ungwa’ chib kømig kønrrun. ¹²Kaguende ñim øyeeg marøb kuibe Tiuswei misaameran chi palabigwan treeg purugúitø kørørmismøtø, Tiuswan ‘mayanguen ungwa, ungwa’ chib kømikkuha truba truba kønrrun. ¹³Inchen tru ñim øyeeg purugúigu ñimbe mumera kui asiilø køn. Katø nømbe Tiuswan truba tabig waminchun, Cristoi tabig srø wamyu pønrrøwa, truig maig taigwan ñim møra, truigwan kenamarikkurrimba, katø ñimbe nømun merøbala kømø purugub, katøganelø mayeelan treetøwei purugub indikkurrimba. ¹⁴Katø nøm tru ñim purugúigwan utabeløbe ñimuyasig Tiusba waminchippe, ñimuimburab truba nu undaotøga martrun, Tius nui ka yandø tab indigwan tøgagømburab tøgagønrrai ñimun tranikkurri. ¹⁵¡Tiuswan ‘mayanguen ungwa, ungwa’ chinrrab, wamindiitøgabe kan mandøguen tamgaig purø nuig tabig keta tranigwan!

Pablo Tiusweiwan nò maròb pasraigwan chinchangig waminchib

10 ¹Na Pablo ñimun òyeeg martrigay chib waminchar, Cristoi tru purò tammayig kuitògaba, purò tab inchibig kuitògaba. Tru na ñimui malau pasrappe, chi tre chish waminchib pasròmíig kòn tainab, trube, peesròn pasrappe, maig tamigwan kelarrab, kelarrab trenchibig kòn tainabig. ²Na ñimun trenchinrrab inchar, na ñimuisròmaya arrua, namun mòilògòsròn ka namuimburaptò isub yu pirau maig kòbashtiig amòñibelò kòn chibelan kelarrab, kelarrab tamig tògagúigwan tiusmanda ñimun trendamig kòmònrri inchunrrigay cha. ³Pòs nambe misag kuinabwei inchendò, yu piraelò maig kwayabelò kòben, treeg kwayab amòñimeelò ker. ⁴Kaguende tru chitòga kwayamig nam tògagúibe, mòguelain kònrab kòmòtò, trube Tiusweinug maramburab maròbig, treeg kòn, ni mumaygucha chindamga murelò nugwaimandzig pònsraig pònrabelan pòtiitsamig. ⁵Pòs truitòga nambe tru kusremburab kusrewa wamindiilanba, katò tru purab nòrreelò isuilò misaamera Tiusweimburabigwan nebua ashmònrri sòtò pasramisròb kurrabigwanba pòtiitser, tru chigurrimbunò isuilane Cristo maig kònrri inchen, treegu pònrònrri merrarrowa pònsròb. ⁶Incha ñim newan mòròbelò misra pònrarmisrene, tru maig taigwan mòrmeelane nambe mòra melònrri mara kòrròmartrab pònrer.

⁷Ñim kui ñimui kabyu maig kenagòben, ka palatò isua ashibelò. Mòikkòben, isa kòmò Cristoin kurmba isua pasròwabe, trube, iigwan isua kòmíig kòn: Nòma Cristoin kuig kòbene, namgucha Cristoielòtòwein kuin kui. ⁸Maig maramigwan nam karub tòga pònrònrri Señor namun trana pònsraigwan, iigwan na purò mòg inchib waminchib pasrab lataig indinaindògucha, nabe chi kòrig misrabe pasròmumònrri. Pòs tru maig maramigwan karub pònrònrri Señor namun trana pònsròppe, ñimun mindishaguen kòrròmartrain kòmòtò, Tiusweimburabigu nòrròram purugunrrauguen tranig kuig kòn. ⁹Pòs na kilgamera pòra, ñimun truilòtòga ke kwaaròsròg kòb lataikkucha indig kòmònrri inchar. ¹⁰Pòs mòilòbe trenchibelò kòn: “Tru Pablo kilga pòriilòbe purò murtoò tranòbig, ke menrra mur waminchibig treelò kòn cha. Inchendò nòashib namba pasrappe, chi trengatig kòmòòllig, waminchibgucha chi may waminchimíig kòn” cha. ¹¹Pòs tru treeg chibelòbe, trube, iigwan isua kòmíig kòn: nam yabsròm pònròwa, kilga pòrigu mandò chib pòròbelòbe, ñimui utu amrrua, maròbgucha treetòwei martrab kui.

‘Nuig misròb mòg inchibig kòn’ taigwan lòtab

¹²Pòs nambe tru nòmasiitò ‘truba tabelò ker’ chib pònrabelò truilò mailò kòben, namgucha nòmba latalò ker chib pònròmòwei, kabe nòm maig tabelò kòben namgucha treelòtòwein tabelò kòbraitashchab inchib pònròmòwei

inder. Trune truiløbe nōmasiitø kangurrin kangurri mayangatig kōtashib, katøganelø lataitøwein kōbraitashchab inchib pōnrrappe, chugúinguen mōrmeelø kōn. ¹³Inchen nambe mōg inchib ke purabgucha waminchib pōnrrōnrrab kōmōtø, Tius namun mayangatig martrai pōnsraigwan nambe treegwandø marøb pōnrrer, katø ñimuisrøngatikken pumig kōnrrai tranigwan marøb. ¹⁴Kaguende nambe namuinukkurri webunagucha pōnrrōmer, pōs nam ñimuisrø pumuig kuig lata. Pōs nambe ñimuisrøngatig Cristoi tabig srø wamwan nammerrigwei srua amrruig kōbig kōn. ¹⁵Kabe katøganelø nōrreelø marigu kebamba, purab mōg inchib waminchibgucha pōnrrōmer, namuinukkurri webambub. Masken treeg kōmōtø, ñimui isubigwan Jesucristoinug pasra tōgagúigu katøguchi nōrrōrab amrraimab isua muniirab meler, namui maramig ñimui utube nōrrø larrøbichib inrrai, ¹⁶Tiuswei tru tabig srø wamwan ñim corintoelainukkurri mas yabsrønguen eshka kusrenanig kōnrrai; peenug katøganelø kebamba marinug trusrø nam kebuna mōg inchib waminchib pōnrrōmōnrrab.

¹⁷Inchen mōikkōben nui misrøb mōg inchib waminchib pasrag kōbene, nōasiitø kōmø, Señorweiwane tab kui mōrøb tabig waminchib pasrøbash. ¹⁸Kaguende nōasiitø ‘truba tabig kur’ chib, nuimburaptø waminchibigwan tabig kui asha kōrrōmarig kōnrrab kōmōtø, tabig kōn cha, Tius nō wamindig, trube tabig kōn.

Pabloa, ‘Cristo nōashib karua øriilø ker’ chib ka isatø inchibeløba

11 ¹Ke na chugúí mōrmíig lataig na mayandø wamincha mōrtrab ñim trunun ka awentaimbe kōtan. Pōs na treeg indingucha ñimun ka awentarray chinrrab inchar. ²Kaguende ñim mōigweyasig pōnrrappe, ke truígweindø kōnrrai, na treeg inchib truba isub pasrappe, Tiusweinukkurri arrubiitøga treeg inchib pasrar. Muba kasharanrrab misrabe, truibatø kasharanrrai nabe ñimun treeg mara tōga pasrar, trube tru Cristoba, tru nō perainrrab arrub kwaløm nui merrab kan mu mōøbagucha kímø srusrø newan chishig lataitøwei na ñimun nun treeg kenamartrab. ³Inchendø nane kōrig isutan, tru ul purø may kebenørkamig tōgagúitøga tru Evan kebenørkøb lataitøwei ñimungucha mumay kōben ñimui isubigu pelørkōngarunrraitamab tru ñim isa kōmø pōnrraigwanba, tabig chishchig Cristoinug pōnrraigwanba. ⁴Kaguende mōikkōben ñimun tru nam eshka kusrenani lataig kōmōtø, Jesúsweiwan peemay eshka kusrenanøb arrin kui, kabe tru ñim Espíritu Santo uta tōgagúigwan kōmōtø, katøgan peg espíritun waminchib arrin kui, kabe Tiuswei wamwan ñim uta tōgagúigwan kōmōtø, pegwan waminchib arrin kui inchibigwane, trube, ñimbe chi chimø melabelø kōn. ⁵Cristo nōashib karua øriilø misrøb, tru purab nōrreelø chib pōnrrabelai merrab chiyugucha lamíig kōmur nagucha. ⁶Pōs nabe nai wamindigube kan mōrøptø purramdiig, may waminchimíig kuinaindøgucha, nebua kusreb asigube nabe maig kuigwan nebua ashibig kur. Iigwane chiyutøgucha ñim tōrgandø ashchai kenamarig kōn.

7 Ñim nørreelø misrtrai, nabe naasiitø chigucha kømíig misrøb, Tiuswei tabig srø wamwan truburø chi utømø eshkaab kusrenanøb pasrappe, ¿kabe nabe kaig marøb pasrabraig kø chindah? 8 Na ñimun purugub pasrønrrab, nabe katøgan iglesiameranguen kerrab lataig utamig nebubig køn, nai chi palab arrubigwan tøgagønrrab. 9 Pøs na ñimui utu Corintosrø uñib urasma nan chi palab arringucha, munguen tranrra cha, miamuig køn. Kaguende nan chi palab arrubigwane namui nunelø Macedoniasrøngurri amrrua, tranig køn. Chiyutøgucha nabe ñim ke nan tranrraindø, tranrraindø inchimønrrab, nabe purø ashiptø megaig køn. Pøs katøgucha mun miamø, nabe treetø ka megabig megamønrrun. 10 Cristoi newan ciertonig nainug pasrai møra lataitøwei, na chi an purugúig utømø, tru møg inchi tab kui mørøb waminchi pasraigwane Acaya pirausrøngucha nane muguen waminchimønrrai katønrraamøn. 11 ¿Chindimbagurri? ¿Pøs kabe na ñimun undaguig kømubra chindah? ¡Pøs Tiusbe asha pasran, nabe ñimun undaguig kui!

12 Nabe tru purugurray chib miamø maig marøb arrigwane marøbig maramønrrun, an utab pønrrøbendø, tru nam lataitøwei marøbelø ker chi køptø tru kemesratøguen møg inchi waminchi pønrramigwan labelan marbashmø kanmaytø kata pasrtrab. 13 Kaguende tru treeg inchi beløbe, Cristo cierton nøashib karua øriilø kømøn. Tru marøbeløbe ka may wamincha isatø marøbelø, Cristo nøashib karua øri latailø misrøb treeg inchi belø køn. 14 Inchen øyeegwane ke kwaara asamikkucha kømøn. Kaguende Satanástøweinguen kan ángel tabig tørigwan tøgag lataitøwei misrøbig køn. 15 Inchawei øyeebe kwaaramdiikkucha kømøn, pøs tru Satanás karuigwan marøb pønrrabeløgucha tru sølgandø tabigwan marøbelø misrøb pønrrøben. Pøs nømui kaig marimburø maig utamig køben, treegutøweim patsønrrun.

Pablo chine chine kaig nebuinab megaig

16 Pøs nabe katøle trenchinrrab inchar: mugucha nane ke chugúí mormíig kui lataikkucha mara srua kømørnrrigay cha. Inchendø ñim nan treeg isua tøgaguabe, trube, na chugúí mormíig kuingucha, nan treeg ka utørray chinrrab, na maitøguen møg inchi pasramig kønrrai. 17 Tru na naasiitø truba tab kui mørøb møg inchi waminchi pasraibe, nan Señor wamindingaruben wamindig kømøtø, chugúinguen mormubendø wamindi lataig, treeg køn. 18 Pøs truba yamelø møiløgøbenma pirauig maig køben treegu nømasiitø purø nørreelø mørørai inchi pønrrøbene, nagucha treetøwei purø nuig kui mørørai inchi pasrønrrab. 19 Ñimbe ya kusrebelø købendø, chugúinguen mormeelane, trube, ñimbe ke mørøguen isrømøzhig melabelø køn. 20 Møikkøben ñimun maig martrain chippe, ke treeg marøb melønrrai inchi bigwanba, ñimun sətø pønsra nø tøga kørømisrtrab marøbigwanba, ñimun chi isa køben kerrawa, nui marøbigwanba, ñimune

chigucha komeelø marøb nuig misrøb pasrabigwanba, ñimun maløbøtø pashaguchib, treeg inchibigwanbabe, trube, truigwane ñimbe ke chi chimøzhiitø melabelø køn. ²¹Pøs nambe øyeeg kenamarøb pønrramibe yangucha kullaguelø købrain køn tamig, nane kørikken køtan.

Kaneløma ke nømasiitø chinetø møg inchib wamincha mørene, treetøwei nagucha martrab, treeg wamindamibe na chugúí mørmøgølig lataig wamindig kuindøgucha. ²²¿Nømbe hebreosmera kø chindah? Nagucha hebreotøwein kur. ¿Nømbe Israelwei misaamera kø chindah? Nagucha Israelwei misaatøwein kur. ¿Nømbe Abrahamwei misaamera kø chindah? Nagucha Abrahamwei misaatøwein kur. ²³¿Nømbe Cristoiwan marøb melabelø kø chindah? (Pøs chugúí mørmíig lataitøwei waminchar) Nabe nøm lataitøguen kømø, masken marøb, marameløyugucha mas mur marøb, kailan keeri yau nømun lataitø kømø, katø katø merrarawa keeriinab, ichaguchibgucha, mam ichagutsamigwan nømun lataitø kømø, ichagutsamburab ichagutsinab, katø katø ke yandø øsig kømurmab isui megamig pub, ²⁴katø trattø pijibe judíosmera maig ichaguchibelø kuigwan treinta y nuevebatø ichagutsinab megabig kur. ²⁵Katø pønmay tsiitøga ichib srúa kuinab, katø kan pijibe kwetchab sruutøga petinab, katø pønmay barco pitis misrøb chab mincha, piu asentaben, kan pijibe kwalma y mawa nane mar tøbøtaasrø pi srúa yaig megamig neubig køn. ²⁶Chu urastøgucha naimbe webya yamitø, yamitø nebuben, kanmaywane nørrø pimerayu chine purayaig megamig nebuben, kanmaybe nileelai utuwan chi kuinanrraptiig purayamig nebuben, kanmaybe naim pirau misaameratøwei chigøben marinanrraptiig pureb yamig nebuben, kanmaywane judíos kømø misaamera chigøben marinanrraptiig purayamig neubig køn. Inchen kanmaywane ciudayu kørig kømdiig inchibeløyu purayamig nebuben, katø kanmaywane mu misag warab waraimøsrø kørig kømdiigu purayamig nebuben, kanmaywane maryu chigøben kuinanrraptiig treegu pureb megamig nebuben, katø kanmaymerawane ka isatø ‘Cristogurri nunelø ker’ chibelø chigøben marinanrraptiig, treeg unamig neubig køn. ²⁷Marameløgucha purø murig, trurrigu ni mandøguen kømui megamig, treeg neubig køn. Katø katø kibguen kimøwei, katø parøgwai mørøb, pi mulgwai mørøb, katø katø chigucha mamíig megamig neub, kørrag kui megamig neub, asru kemig chigagúinab megamig neub inchibig køn.

²⁸Inchen tru kømnetø kwalømmørig na isuim pasramibe iglesiamerabe mayamba chinchib kermab isub pasramig, truig købig køn. ²⁹Møikkøben kullaarain pasrøbene, nan kullaaraig kui lataig købig køn. Inchen møikkøben kaigu srurrengwanguaruinab megabene, nan pusrkwabig køn. ³⁰Na møg inchib waminchib pasramig nebubene, na truburab kømíig kullaguig kuigu, truyube møg inchib waminchib pasramønrrun. ³¹Namui Señor Jesucristoi Møskai, Tius tru managurri managatig mayanguen tabig wamindinabiibe nabe ka isatø inchib pasrømui asha pasran. ³²Rey

Aretas karuigwan marøb wabig, tru Damasco ciudayu kubenadurbe tru damacenosmerai ciuda pøtøgatan laringaruin købig køn, nan kemørtrab. ³³Inchen nane tru ciudayu pøtøgatan srug pirøbanrrig marigugurri kan pendanayu korrørørbelø køn, kan tasinyu waya. Øyamay nabe truigwei taskugurri welula, ibig kur.

Pablon Tius nuimburabig mu asiimíig pønrrabelan kenamarøb

12 ¹Nabe katøgucha naasiitø møg inchib waminchib pasramig køtan, treeg mariibe chi purugumíig kuindøgucha. Nabe piab lataigu na chigøben asilanba, Señor nuimburabelan nan kenamariilanba, trunun waminchab. ²Nabe kan møg ashibig kur, Criston kørewa pasrabigwan, mõi ya catorce añosken køn. Truigwane tru pøn srømbalarøngatig srua yaig købig køn. Nune asrbañau srua yaig køh, kabe asrbañaun kømø, srua yaig køh, chindindø, truigwane maig kui mørmur. Trunune Tiustøwei asan. ³⁻⁴Tru møwane tru srømbala Tiuswei purø tabzhiisrømay srua yaigwan nabe asha kur. (Nune asrbañau srua yaig køh, kabe asrbañaun kømø, srua yaig køh, chindindø, truigwane maig kui mørmur. Trunune Tiustøwei asan.) Inchen trusrømbe ni kan mandø chaguen trendamgailø nøbe wamindi mørig køn, treegwane kan møwane waminchimønrrai meriilan. ⁵Pøs nabe tru møweimburappe si møg inchib waminchib pasrabwei indamønrrun, pøs truiibe nawein kuinaben. Inchendø nabe naasiitø møg inchib waminchib pasrømøtø, na trengatig kømíig kullaguig kuinaigube møg inchib pasramønrrun. ⁶Pøs nan møg inchib waminchib pasrag køben, na treeg inchib pasrainguen, nabe ke chugúi mørmíig lataig indig kømubsruiinrrun. Kaguende nabe cierton waminchibsrubrainrrun. Inchendø nabe treebe marmumønrrun, na maig kuigwan asig tre lataitø kømøwei, na waminchen ñim møri lataitø kømøwei, mas nuikken kuin kui mugøben nan treeg isumønrrai. ⁷Øyeeg chigøben purø nørreelø nan kenamarig, truilø nan purab nuig kurmab isub pasramig marmønrrai, nane nai asru chu uragucha kan kal lataig kebuchib pasrønrrai pasrig køn, Satanás ørig, ni mandøguen kømui pasramig kønrrai martrabig, na purab nuig misrøb pasramig kømønrrai. ⁸Inchen nabe iigwan Señorwan pønmay ‘tiusmanda kerrarra’ cha miaben, ⁹Señorbe nane trenchibig køn: “Tru nai ka yandø tab indig truitø ñune tsabø køn cha. Kaguende tru nai maramburab marøb pasrabiibe ñi truburab kømíig kullaguig kuigu masken tab kenamisran” cha. Inchawei treeg købene, na truburab kømíig kullaguig kuigu mayanguen tab kui mørøb møg inchib waminchib pasramønrrun, Cristoi maramburab marøbig nainug pasrønrrai. ¹⁰Inchawei nabe na truburab kømíig kullaguig kuigu lata, nan tsalø waminab pasraigu lata, nan chi palabigu lata, Cristogurri nan kaig martrabgøba indinab megaigu lata, nabe truba tab kui mørøb kasraarar.

Pablo corintosreelan isub

¹¹Pøs nabe kan chugúí mormíig lataig indig kòn. Inchen na treeg inchainbe nane ñimweinrre indig kòn. Naimburab tabig waminchippe, ñimguen tabig wamindig kònrraptiig kur. Kaguende tru Cristo nøashib karua øriilø misrøb purab nørreelø chib pønrrabelaimbe nabe chiyugucha lamíig kømur, nabe maya chigucha kømíig kuinaindøgucha. ¹²Cristo nan nøashib karua ørig kuin kui asamig, maig kuindøgucha tammay nabe ñimui utu kenamarig kòn: Tius naba pasrain kui ashchai mariilø marøb, kwaara asamdeelø marøb, maramburab mariilø marøb, treeg. ¹³Tru katøgan iglesiameran lataguen kømø, ¿nabe ñimun chiyurren lameelø marøb kørøra pønrsøbrah? Na ñimun tranrrai miamuig, trutøwein kòn. Pøs na miamub kalø marigwan ulø paymø pesannarrai chinrrab inchar. ¹⁴¡Au! Nabe katøguen chab tamaraguen megar ñimun ashchab attrab, møimbabe chabguen pønmayguen kønrrab køben. Treetøwei katø na ñimun mianrrab kømø arrumønrrun. Kaguende nabe ñim chi tøgagúigwan isua lamøtø, ñimun isur. Pøs kaguende ureemera møskalayasig esegab tulisamig kømøtø, uregweyasig esegab tulishib melamibe møskalainguen kòn. ¹⁵Inchawei nabe tab kui kasraatø naiwan kerrigu kastamønrrun, naasiitøweinguen ñimuyasig patsønrrai marøb. Na ñimun mas undaarabene, ¿ñimgurrimbe nane tre undaaramønrrapteh?

¹⁶Pøs trube, naimburappe ñimbe ashibeløguen na ñimun tranrrai miamuigwan. Inchendø nabe ke chi maramdiig køtashib ashib megabig køndainabig kuig køppe, trube, ¿ke chi isa køben kabe ñimun chi wesrabraig køppeendi? ¹⁷¿Kabe na tru møilan køsron na ñimuisrømay karua øriiløtøga chi isa køben, kabe ñimun chi wesrabraig kø chindah? ¹⁸Nabe Titone: “Tiusmanda ashchab irrunrrig” cha, Cristogurri namui katøgan nunewanba nun lincha inrrai ørig kuig kòn. ¿Kabe Titobe ñimune chi isa køben chi wesraig køppeendi? ¿Nambe yamba pailøba treetøwei kandø isua marøb, katø pailøba yamba tru maywandøwei pønrrammørgøppeh?

¹⁹Nambe ñimui merrab ka tab wegørrag køptørre inchib pønrrabelø kui, ¿ñimbe katøgucha møi øyangatig kabe treeg asønain pønrrøgueh? Treeg kømøtø, nambe waminchippe, Cristoinug pønrrabelø kui asamdiig Tiuswei merrab waminchib pønrrer. Inchen nam kerrigu mariiløbe, ñim, nai undaarailø, Tiusweimburab ñim nørørab amrrain kòn. ²⁰Pøs nane køristö køtan na ñimuisrø puben, na ñimun mailø kønrrai isua pasraig ñim treelø kømøwei, katø ñimgurri nan maig kønrrai isua pønrraig treeg kømøwein køptinchen tsaatø indinab pønrrainabgunmab. Nane køristö køtan ñimui utu aleguiyam lailø, møikkøben chi tøgagøben purkwai asiilø, purø trømbøig namig kui indiilø, nøørø katøgan sötømisrøb tarømisrøb ambiilø, katøganuimburab wam kusrub wamindiilø, isa wamincha møriilø, purø nørreelø misrøb pønrrailø, mumaygucha kømíig mara pønrrailø, treeg kønrraitamab. ²¹Incha nane kørig isutan na ñimun katø ashchab puben, Tiusbe ñimui merrab nan kørig purøøren, truba yamelaimburø

nan kisamig nebunrraitamab isua, tru merrabwan nòmui kòsongònrraptiig mariilanba, móguelòba, ishumburmeraba tròmbòig mariilanba, mu mandiiimíig chi maròg kòben tròmbòig maramitò srua ambiilanba isua mòrmuin kòben.

‘Isua ashiptò melònrrigay’ chib wamindiilò srabeig

13 ¹Na ñimun ashchab arrumig mòimbabe pònmayguen kònrrab kòn. Chigòben kalò puigwan asha maròppe, kan pailò kui, pònelò kui ‘maig purayaigwan treeg kòn’ cha nòmashib eshkaendòwei, maig kònrrabigwan asha maramig kòn. ²Nabe tru pamay kònrrabyu marig merrabwan arrua, ñimba pasròwa, kanmaytò isua kònrrai eshkaig kòbig kuig kòn. Na mò katò ñimba pasròmòwagucha katòle katò eshkanrrab inchar, tru merrabwan kaig maròbelanba, mayeelò katòganelanba na katòle arruppe, kan waachaalleelò chib mun lastima ashchab attrab kòmur cha, ³kaguen ñimbe Cristo nagurri waminchib pasrabig kuitashchab ashig kòb ñimbe trurre lab kuig kòben. Cristobe ñimba mumay kòmigwane chi martrabga kaizhikkucha kòmòtò, nòbe ñimui utu maramburab maròbig kòn. ⁴Pòs isa kòmò, Cristobe misagwei asr lataitòwei kullag kua, kurusyu mesròben, kwaig kòn. Inchendò Tiuswei maramburab maròbiitòga òsig wan. Pòs katò treetòwei nambe Cristoinuube kullaguelò kuinabendò, Tiuswei maramburab maròbiitòga Cristoba òsig pònrramònrrun ñimuyasig maròb pònrrònrrab. ⁵Ñimui isubigwan Jesucristoinug pasra pònrraigu pònrrabraitashchab tab isua ashib, maig kòbraitashchab ñimasiitòwei paya mòròb inday. ¿Jesucristo ñimuinug pasrabig kuin kui ñimbe ashmeelò kò chindah? tru ñim maig pònrraitashchab isub pònrraigu chi kalò webammuiikkurrimbe. ⁶Pòs namui isubigwan Cristoinug pasra tògar kua nam tabig webamba pònrraigwan ñim nebua ashchun. ⁷Incha nambe Tiuswan purugurra cha mier, ñim chigucha chi kalò maròb kòmònrrai. Kabe tru namun mailò kuitashchab ashen, tab webambigwan ashchai isua kòmòtò, ñim tabigwan maròbelò kònrrai isua inder, ñimuin kabyube nambe kegòrra pònrrai lataig asònaindògucha. ⁸Kaguende nambe tru newan ciertonigwane chi treeg kòmònrrai martrab indamgaig kòn. Treeg kòmòtò, tru ciertonigweimburab nam maròb pònrramibe kòn. ⁹Inchawei namun kullaatò mòròraingucha, ñim tabig mur pònrròbene, kasraabelò ker. Incha nambe Tiuswan iigwan miabelò ker: ñim newan tabelò kònrraimab isua. ¹⁰Inchawei òyeekkurri nabe yabsrò pasrappatòwei iigwan pòrar, tru na ñimuisrò pua, nai maramigwan na tsakkandò maròb pasrònrrab arrumig kòmònrrai. Señor nan ashib karub pasrònrrai tranòppe, pinishib inrrain kòmòtò, kusrua pònrsòbguen inrrai tranig kòn.

‘Ka amòñiguh’ chib wamindiilò srabeig

¹¹Trube, mòimbe yandò, nai nunelò, maya nuguen kasraaray. Ñimbe newan tabelò kònrrab inchib, na ‘òyeeg, òyeeg melònrrigay’ chib wamindigwan mòra maròb, katò pònrrabgucha kandò isua

pørrørrigay. Katø kangurrin kangurri tab warørrigay. Tius tru undag købig tru chi isumgaig tab købiibe ñimba pasrønrrun. ¹²Kangurrin kangurri ‘ka amøñiguh’ chib tabig wamab, Tiuswei undag købiitøga tasig tranay. ¹³Tiuswei misamera mayeeløba yuelø ñimun ‘ka amøñiguh’ chib wam øran.

¹⁴Señor Jesucristoi ka yandø tab indiiba, Tiuswei undag købiiba, Espiritu Santoi tru trakkandø lincha pasraibabe ñim mayeeløba pasrønrraimab isur.